

Rombak pengurusan tertinggi beri nafas baharu reformasi sektor awam

● Rombakan dalam pengurusan tertinggi ini bertujuan menyuntik nafas baharu ke dalam perkhidmatan awam dengan melantik individu mempunyai latar belakang pengalaman luas, profesionalisme dan komitmen terhadap agenda pembaharuan

● Lonjakan positif dan signifikan dijangka berlaku khususnya dalam meningkatkan kecekapan, kualiti perkhidmatan, produktiviti, ketelusan dan akauntabiliti, profesionalisme, penyertaan awam, bahkan penggunaan teknologi pada era digitalisasi ini

Oleh Prof Madya Dr Nor Waliza Abd Wahat
bhrencana@bh.com.my

Kelmarin, Ketua Setiausaha Negara, Datuk Seri Shamsul Azri Abu Bakar mengumumkan rombakan dalam kalangan pegawai tertinggi perkhidmatan awam membabitkan sembilan Ketua Setiausaha (KSU), seorang Timbalan KSU (TKSU) dan dua ketua pengarah.

Inisiatif rombakan ini memperlihatkan usaha jitu kerajaan bagi mengukuhkan pentadbiran negara. Bahkan ia menandakan bermula era reformasi dalam perkhidmatan awam di bawah pentadbiran Kerajaan Perpaduan pimpinan Perdana Menteri, Datuk Seri Anwar Ibrahim.

Dalam usaha untuk meningkatkan kecekapan dan ketelusan, rom-

bakan ini dilihat langkah proaktif bagi memastikan kelangsungan tadbir urus lebih baik, lebih-lebih lagi dalam kementerian strategik seperti Kementerian Pertanian dan Keterjaminan Makanan, Kementerian Pertahanan, Kementerian Pembangunan Usahawan dan Koperasi serta Unit Kerjasama Awam dan Swasta (UKAS).

Perkhidmatan awam adalah tulang belakang pentadbiran negara. Ketelusan, kecekapan dan daya responsif terhadap keperluan rakyat adalah elemen penting bagi memastikan kerajaan dapat melaksanakan dasar dan inisiatif dirancang.

Rombakan dalam pengurusan tertinggi ini bertujuan menyuntik nafas baharu ke dalam perkhidmatan awam dengan melantik individu mempunyai latar belakang pengalaman luas, profesionalisme dan komitmen terhadap agenda pembaharuan.

Pelantikan baharu membariskan sembilan KSU, seorang TKSU dan dua ketua pengarah ini membawa harapan untuk memperkenalkan pendekatan baharu lebih inovatif, strategik dan relevan dengan kehendak semasa. Ia juga memastikan tiada budaya stagnasi dalam pentadbiran boleh membantutkan kemajuan negara.

Dengan bermula era reformasi dalam perkhidmatan awam ini, lonjakan positif dan signifikan dijangka berlaku khususnya dalam meningkatkan kecekapan, kualiti perkhidmatan, produktiviti, ketelusan dan akauntabiliti, profesionalisme, penyertaan awam, bahkan penggunaan teknologi dalam era digitalisasi ini.

Ia termasuk penambahbaikan sistem e-kerajaan membolehkan rakyat berurusan dengan agensi ke-

rajaan secara dalam talian, mempercepat proses dan memudahkan akses kepada perkhidmatan

Rombakan berlaku dalam Kementerian Pertanian dan Keterjaminan Makanan memberi impak besar terhadap sektor pertanian, komponen utama ekonomi Malaysia.

Kementerian ini bertanggungjawab terhadap keterjaminan makanan, isu sangat kritikal khususnya pada era cabaran global seperti perubahan iklim dan krisis geopolitik yang boleh menjejaskan rantaian bekalan makanan dunia.

Dengan pelantikan KSU baharu, Datuk Seri Isham Ishak, tumpuan lebih besar boleh diberikan kepada peningkatan produktiviti pertanian, inovasi dalam teknologi makanan dan strategi lebih mampan untuk memastikan Malaysia tidak hanya mampu menampung keperluan makanan dalam negara, tetapi menjadi pemain global dalam sektor ini.

Perubahan kepimpinan ini berpotensi memperkukuh kerjasama dengan sektor swasta, petani dan golongan profesional dalam usaha memastikan keselamatan makanan terjamin untuk jangka masa panjang.

Pendekatan lebih strategik utusi cabaran

Kementerian Pertahanan pula institusi penting bertanggungjawab terhadap keselamatan dan kedaulatan negara. Dengan ancaman global semakin meningkat seperti ancaman siber, keganasan dan ketidakstabilan serantau, kementerian ini memerlukan kepimpinan tegas, proaktif dan inovatif bagi menangani isu keselamatan.

Pelantikan Datuk Lokman Hakim Ali sebagai KSU baharu dijangka memperkenalkan pendekatan lebih strategik dalam menangani cabaran ini. Penekanan terhadap pemodenan peralatan pertahanan, latihan ketenteraan lebih berkesan dan kerjasama antara-bangsa antara aspek berkemungkinan menjadi fokus utama.

Rombakan ini dijangka mempertingkatkan keupayaan kementerian merangka dasar lebih kukuh bagi memastikan Malaysia mampu berdepan dengan sebarang ancaman baharu dan moden secara berkesan lagi efisien.

Usahawan dan koperasi pula memainkan peranan penting menggerakkan ekonomi negara. Kementerian Pembangunan Usahawan dan Koperasi bertanggungjawab memupuk pertumbuhan dalam kalangan usahawan tempatan dan memperkukuh gerakan koperasi sebagai alat pembangunan ekonomi inklusif.

Ia termasuk pembangunan ekonomi bagi golongan minoriti seperti orang kurang upaya (OKU), warga emas, ibu tunggal, Orang Asli dan juvana serta bekas banduan.

Pelantikan Datuk Seri Khairul Dzaimie Daud di kementerian ini diharap dapat memberikan dorongan segar kepada usaha membangunkan sektor perusahaan kecil dan sederhana (PKS), meningkatkan daya saing usahawan dan memperkukuh gerakan koperasi.

Inisiatif seperti pembiayaan lebih mudah diakses, program latihan lebih komprehensif dan pembentukan rangkaian perniagaan lebih luas dijangka menjadi fokus utama di bawah kepimpinan baharu.

Reformasi ini juga dijangka membawa kepada kerjasama yang lebih erat antara kerajaan, sektor swasta dan institusi kewangan bagi merangsang pertumbuhan ekonomi melalui usahawan dan koperasi.

UKAS adalah entiti penting berfungsi sebagai jambatan antara kerajaan dan sektor swasta dalam pelbagai projek pembangunan. Kerjasama awam-swasta (PPP) adalah satu model sangat penting dalam pembangunan negara, terutama dalam projek infrastruktur besar dan memerlukan pelaburan tinggi.

Rombakan dalam kepimpinan UKAS memberi peluang memperkukuh strategi PPP dan memastikan lebih banyak projek pembangunan dapat dilaksanakan dengan cekap.

Pegawai baharu dijangka lebih giat merancang dan melaksanakan projek strategik yang dapat membawa pulangan ekonomi besar kepada negara.

Tambahan pula, fokus lebih mendalam terhadap pelaksanaan telus dan akauntabiliti dalam kerjasama awam-swasta ini akan meningkatkan kepercayaan pelabur dan sektor swasta terhadap kerajaan.

Secara keseluruhannya, rombakan pengurusan tertinggi perkhidmatan awam ini dijangka membawa kepada reformasi signifikan dalam pentadbiran kerajaan.

Pelantikan pegawai baharu di kementerian terbabit menandakan komitmen kerajaan memastikan kepemimpinan lebih dinamik dan berwawasan.

Dengan fokus kepada inovasi, ketelusan dan akauntabiliti, rombakan ini berpotensi membawa perubahan positif berterusan. Ia bukan sahaja meningkatkan kecekapan pentadbiran tetapi juga memberikan manfaat langsung kepada rakyat melalui dasar lebih berkesan, telus dan mesra rakyat.

Pada masa sama, ia juga memperkukuh kedudukan Malaysia dalam arena global sebagai negara mampu menangani cabaran semasa dengan kepimpinan berkualiti.

Semua artikel penulis tamu adalah pendapat peribadi, bukan pendirian rasmi BH



Ketua Jabatan Pemajuan Profesional Dan Pendidikan Lanjutan, Fakulti Pengajian Pendidikan, Universiti Putra Malaysia